

四庫全書

史部

欽定四庫全書

史部

平定兩金川方略卷八十三
五至

員外郎_臣顧宗泰覆勘

總校官原任侍講_臣王燕緒

欽定四庫全書

平定兩金川方略卷八十三

十二月辛卯豐昇額舒常奏言臣等於俄坡山梁
探得路徑十處雖山險林深向來未從此進俟索
倫兵到突往攻擊可期一鼓而克臣等又於宜喜
達爾圖地方暗踫道路據報達喜達爾圖南首山
下林中似有賊番聲息夜聞微露火光查此處距
三雜谷土兵營盤甚近即係我兵樵採之所此必

賊番潛伏計圖搜掠臣等除每日樵汲之人照常
派兵護行外是日夜間先派兵丁伏於樹林將盡
處天色始明林內果有賊三四百名分為三路突
出不知我兵已經準備一出樹林即來攻擊官兵
奮勇鏖戰殲戮甚多賊番不能抵禦仍進林中分
竄官兵趕至溝底搜查已無踪跡始行酌撤昨接
阿桂抄送奏稿知小金川地方已全攻復現議進
勦金川臣等俟阿桂酌定分攻道路扎知到日所

添派楚兵二千名亦可到齊此處再揀三千兵臣
豐昇額帶領即遵

旨由丹壩前進臣舒常仍駐宜喜一帶牽掣賊勢至現
在等候阿桂信息之時若索倫兵到即挑選此處
之兵暫攻俄坡地方若克要隘即由此處進剿不
必前往丹壩奏入

上諭軍機大臣曰豐昇額等奏稱於俄坡覓路進攻俄
坡在金川以北從前原定路徑即有此路稱其地稍

平坦嗣以探聽未真遂未用及今既訪有可進之路則由彼前抵勒烏圍自更收為便捷至所帶之兵豐昇額即以原撥帶往之五千兵督率進剿亦甚妥便前諭豐昇額前往丹壩因與阿桂現定之谷噶凱立葉地方相近是以諭令豐昇額當赴阿桂軍營協同酌辦今既覓有俄坡一路不但必另往丹壩即與阿桂軍營相近之處豐昇額亦毋庸前往矣至豐昇額即往俄坡進剿則宜喜一帶尤不可不留舒常彈

壓控馭如豐昇額進兵後宜喜等處有可進攻之機
舒常不妨酌量牽綴賊勢但必須可得便宜方派兵
前往不宜輕率撲礮致挫壯氣

乙未豐昇額舒常鄂寶奏言駐防吉地丹東之副
將鄭國卿等稟稱吉地所屬之甲魯珠爾德等處
雖現在無賊匪潛擾然兵力尚單應請添兵臣已
於宜喜軍營內酌撥三百名前往分防駐守奏入
報

聞

丙申阿桂色布騰巴爾珠爾奏言查攻掘金川道路臣等連日以來通盤籌計所有谷噶訥立葉兩處詢之通事頭人等所稱道路形勢雖各有不同然較之昔嶺功噶爾拉等處究係未經攻打之地賊酋即有預備或尚不至十分嚴密其訥立葉一處頭人等稱須從三雜谷地方行走臣等此時擬先從谷噶進攻俟抵谷噶之後察看賊番光景酌

量分兵數千由雜谷地方前往託名撥赴綽斯甲
布軍營一至凱立葉路口即從此入庖使賊番無
由知覺若能攻過凱立葉則谷噶之兵亦可會合
深入至南路官兵已議從馬柰馬爾邦進取近日
巴旺布拉克底頭人均來美諾臣等詳加詢問據
稱河南之博堵距布拉克底之深嘉卜甚近河北
之馬柰等寨向係布拉克底故地土司等派土兵
前往而以大兵繼之猝然搶佔可望得力但以須

於當噶爾拉駐兵以分賊勢另派官兵從臨卡深
嘉卜繞出分攻博堵馬柰而於馬柰馬爾邦等處
以次派兵進取則河南之兵可以進攻曾達河北
之兵可以真取馬爾邦今臣阿桂現駐美諾賊人
必專守功噶爾拉昔嶺一帶或於各處未經進發
之前仍其不備先從巴旺布拉克底地方掩襲抑
或仍須各路分攻之時突然進取已令巴旺等頭
人前往踣探諒數日即可探明稟覆查金川番衆

無多所以堅心死守者恃其險阻之故但賊境四面皆山形如釜底若多兵而多路一路得勢各路皆迎刃而解今不但臣等現有之兵欲分谷噶凱立葉兩處尚覺不敷即南路一面從當噶爾拉牽綴一面從深嘉卜臨卡分攻兵力亦不免單弱是以臣阿桂萬不得已前此既為省兵之計又為請兵之奏至臣等此時籌畫必期迅速擒渠掃穴未可仍似上年輕率前驅轉成頻阻且以現在人夫

而論若欲設臺隨營俱用勢尚不敷臣等一面籌
辦進勦機宜一面催令督臣等預備妥協庶臨期
無虞掣肘

同日阿桂又奏言臣接奉

上諭令於富勒渾王進泰二人中酌派防守後路臣查
富勒渾王進泰均屬小心謹慎然過慎則惹遇有
番人即不免望而生疑而用內地稽查盤詰之法
施之新附外番其情斷不能安且該督等於山川

形勢以及軍行機要均未能悉臣查副都統成果
於留防事宜尚堪勝任雲南提督常青練習軍務
並熟習邊情本皆為軍營待用之人但成果向有
腿疾而常青近亦羸弱多病即日大兵前進遇有
緊要後路酌令成果帶兵駐守如尚需人再令常
青往駐底可無虞

同日豐昇額舒常奏言臣等前遵

諭旨由丹壩進兵查看彼處地方若從丹壩前進必須

攻克穆爾津岡始可往攻勒烏圍此處碉卡雖多賊番守禦究不若宜喜達爾圖之堅固詢問土都司那木喀搭爾據稱穆爾津岡迤南即係凱立葉等語臣等正籌攻取間接阿桂等來札稱西路之兵定由谷噶凱立葉而進查阿桂等所定進兵之路正係臣等所探地方阿桂等若從此進兵共臣等又領兵往攻穆爾津岡兩路齊舉賊番不能互相救應必得迅速成功如阿桂等就近分兵並勦

穆爾津岡臣等仍照前

奏攻取俄坡一路該處雖山險林深必須向上攻擊
若於三路合進乘賊不能救援之時奮力攻撲或
易於得手均奏入

上諭軍機大臣曰阿桂駐在美諾已經一月若俟朕批
摺回時已四十餘日距所擬歲底歲初尅期合勦之
說正當其時阿桂各項部署諒已就緒務即酌派妥
協與豐昇額明亮訂期會勦仍將進兵日期迅速奏

聞至阿桂所擬谷噶凱立業及馬柰馬爾邦兩路進
兵若此事早時聲張賊得以預為防堵殊屬非計如
欲赴馬柰一路應令桂林或富德統兵徑往當噶爾
拉進攻使賊信我兵仍由原路進勦力為堵禦我兵
潛赴馬柰等處出其不意自可易于得手其欲赴谷
噶等處者亦當於功噶爾拉山梁派兵攻勦以綴賊
番全勢而我兵仍潛由大板昭直取谷噶凱立業兩
路亦使賊番猝不及備如此方合用兵指東擊西奇

正虛實並用之道阿桂熟於軍務當斟酌實力為之
佇聽提音又據奏小金川全境必有能事之大員始
堪督率富勒渾王進泰二人均屬小心謹慎然過謹
則蕙此論頗為近理前次原以二人身任督提地方
乃其專責且呼應亦靈是以派令後路照料今阿桂
所奏如此則二人自不足恃據稱雲南提督常青練
習軍務熟悉邊情於緊要之路酌令常青往駐等語
常青留駐美諾等處自為有益已有旨令富勒渾等

諸事與之虛衷商酌勿稍存畛域之見並著阿桂轉諭常青一切當引為己任勿以現有總督在彼稍存推諉仍將辦理情形具摺奏聞至美諾既有常青已為足恃成果雖有腿病然帶兵諳習實為得力之人阿桂雖自凱立業進兵則三雜谷後路宜有接應當令成果帶兵一二千在三雜谷駐守可即妥酌行之又據豐昇額等奏於丹壩一路進兵之說尚屬未定前因丹壩一路難於徑進豐昇額竟可不必前往即

速將俄坡一路踣訪明確俟阿桂扎會師期克日進
勦

同日明亮富德奏言南路官兵進勦金川議由巴
旺布拉克底前進攻取馬柰馬爾邦查該處進兵
道路自格藏而西過巴旺境內循河北前至布拉
克底之臨卡其前為駱駝溝與馬柰交界迤西即
為馬爾邦由此渡河而南地名曾達相連克舟九
寨若由河南深嘉卜發兵亦必從此經過為進攻

噶拉依之要路臣明亮前在叻噶爾拉山梁可以望見其南北臨河兩山形勢阨塞之處彷彿小金川而道路備細情形未能深悉臣等一面派令都司崔文傑前赴巴旺與土司等面商進攻機宜並圖取山形地勢以便呈

覽查南路沿山要隘現皆派兵防禦哨探賊人但於木境增築礮卡以圖死守並不敢稍來滋擾則其望風畏懼止慮大兵仍各路進攻而至于馬柰馬爾

邦設守未必盡能周密臣等俟崔文傑回營先挑屯土兵丁潛赴該處乘其猝不及覺攻得地方即可全力直入臣等因土兵踰山越嶺行走最稱便捷而於襲擊等事用之尤為得力查新投汗牛十回寨其中壯健各番已派叅將許世亨挑帶來營備用其餘滿漢官兵並新到黑龍江兵丁俱酌量抽赴章谷一帶隨後策應再兵行糧隨最為緊要自章谷以至臨卡約計五站現已知會桂林並扎

臬司孛世傑預為妥協奏入報

聞

同日富勒渾王進奏言臣富勒渾前至美諾詢之將軍阿桂等西路擬由大板昭一帶進發南路擬由馬爾邦一帶進發所有餉道情形自應另行籌畫查大板昭進兵係由布朗郭宗取道前往該處糧臺若仍照舊安設則破礮帛噶爾角克礮喇嘛寺等處俱屬小金川境內距賊較近一路臺站

必須多駐兵丁節次防護方保無虞如有資哩由別斯滿一路運赴布朗郭宗計程一百四十餘里不特站程較短且附近瓦寺地方前路既有大兵鎮壓而美諾路頂宗鄂克什等處復有官兵駐守聲勢相連糧臺前後俱有照應無庸多費兵力而賊已難窺伺且資哩以外由明郭宗至喇嘛寺各臺俱可裁撤較為節省第機宜密速若此時遽行安設恐賊者知覺預作隄防現在仍由明郭宗一

帶轉運以待兵行所有前次調派官員夫馬業俱陸續到來昨已密令臬司郝碩一俟將軍阿桂移營隨將所備夫馬帶赴別斯滿一路安設新站臣隨後即將喇嘛寺等站現設糧員夫馬全行捲撤一併帶往布朗郭宗添補以資輓運所餘馬匹人夫留備大兵前進加站之用至南路馬爾邦馬奈係由巴旺一路進發其價格宗一帶附近賊境之各糧臺似應全行裁撤以節兵力并免賊番窺伺

至守護糧臺臣復分飭站員揀選強壯糧夫合同防護奏入報

聞

同日郝碩劉秉恬奏言查近日美諾軍營兵食或將日隆達木巴宗二處存貯米石由站滾運或按站給價即令商人一直運交計共運到米七千九百餘石現在軍營除官兵支食及運往南路外尚存米二千餘石伏思南路軍糧運價倍昂於西路

即以僧格宗由南路運米一石需運送價銀二十
二兩由西路運米一石需價銀十五兩是由西路
運米一石即可省一石之費臣等不敢稍分畛域
商同侍衛奎林及臬司李世傑將南路之科多一
站趕緊安設每日運米三百石務先運米一萬餘
石即可節省銀七八萬兩至底木達布朗郭宗一
帶先經我兵搜獲米六千二百餘石指日辦理
金川須由此路進發臣等飭令各站糧員運過米

一千二百餘石俟大兵前進隨宜措置奏入報

聞

同日桂林奏言臣仰蒙

恩命督辦糧儲前在軍營深知南路糧運與別路不同
緣程站較遠人夫更調較難必須兼資土司烏拉
而烏拉之來惟在夏秋兩季一至冬季即已無從
催覓此時達木巴宗日隆一帶存糧充裕核其價
值較南路多寡懸殊現經將軍阿桂酌令分運接

濟臣將此暫時未撤之夫由美諾趕運章谷而章谷現存米穀谷庸供運南路軍糧即備指日改途進攻之用蓋南路進剿之路雖多然皆以章谷為後路章谷存貯有餘則轉運軍營自易而自省城至章谷又以打箭爐為適中之地該處係沿途之地存積不患過多且南路土司烏拉多經其地截留僱募亦為省便現在章谷打箭爐及口外各站共計米一萬四十餘石以現在兵夫數目核計約

敷一月有餘已飭上緊趕運務期源源接濟奏入
報

聞

己亥豐昇額奏言查俄坡一路山大溝深實難徑
進今擬仍由丹壩一路進攻於十二月初三日帶
領西安滿兵及雲南甘肅綠營兵共三千名索倫
兵三百名前往丹壩預備一面躡訪路徑俟阿桂
處約會進兵確信尅期前進奏入

上諭軍機大臣曰豐昇額等奏俄坡不便進兵自以仍
由丹壩為是但聞該處穆爾津岡一帶路頗險仄從
前岳鍾琪在彼攻剿未能寸進似其地亦非可長驅
徑進者且豐昇額現帶之兵僅有三千三百即新調
之湖廣兵續到亦不過二千兵力未厚又無繼進之
兵在後策應即使得有礮卡亦斷不宜深入至舒常
近在宜喜牽綴賊勢斷不可移動此外更無可為豐
昇額應援之用因念豐昇額為人誠實堅毅之力頗

屬有餘而料事制勝則不逮其祖是以所到之處不
慮其退却而慮其輕進今豐昇額前赴丹孛探訪路
徑靜候阿桂知會師期按日而計亦正當此月下旬
昨諭阿桂二十七八九皆吉日可以進兵阿桂酌定
後即速通知豐昇額按期同進著傳諭豐昇額進兵
後若竟攻得險隘只宜於該處山梁駐兵防守切勿
冒昧深入致賊人抄襲我後

同日阿桂明亮豐昇額鄂寶富勒渾文綬奏言查

川省各屬辦運軍糧遠近遲速不同口外站長道險夏防雨水冬慮冰雪農忙則人夫短少草枯則烏拉又稀因地乘時情形互異即如西路從前自明郭宗至登春木果木等處官兵夫役不下四萬餘人約月需米一萬石餘其從桃關卧龍關一帶水發運道阻至半月有餘軍營及沿途各站若非稍有積儲即不免於貽悞是以向來籌酌運糧不敢不畧為寬餘儲備至於餉銀一項除支發軍營

官兵夫匠鹽菜工食之外附近臺站所需站夫工
價等項亦由隨營總理道分發站員支放約計兩
月費用一併起運俟將次用完再行發解此應時
辦貯糧餉之實在情形也惟是軍需各款固宜儲
備充足亦須斟酌緩急歸於慎重誠如

聖諭必籌可進可退之計方為妥善臣等公同查酌軍
營奉

旨加賞之件原係臨期咨解其平時卹賞銀兩紬緞布

尺等物亦俱隨時酌調備用即鹽菜工食銀兩以及火藥銅鐵等物均可按數核定計月運供惟糧米一項寬餘存貯之地必須近便庶緩急足恃以目下情形而論西路之日隆南路之章谷綽斯甲布之周叟積貯並宜寬裕但其地皆在各土司境內距桃關打箭爐雜谷腦等處自二十餘站至三十餘站不等倘按月辦運之糧一有短缺或乘勝深入添站增夫需糧緊迫近處無從取攜遠供不

免竭蹶恐致周章臣等悉心酌議凡備貯軍需之地當遠近兼資層遞相及無令積聚一處大率軍營於逐日資放之外須常餘一月之糧銀五六千兩火藥三萬餘斤銅鐵等項只須足用今大兵攻克美諾賊巢迅速前進則達木巴宗鄂克什等處均當貯米數千石其南路之打箭爐章谷綽斯甲布之梭磨從噶克周叟並應倣此分貯各路總理司道府等量地勢之遠近時候之早晚數目之盈

紕隨時商酌臣等酌核情形督令分路轉輸則接濟既便亦不致積多成累至綽斯甲布糧運較西南兩路尤遠今春由雜谷打箭爐兩路並進夏秋頗覺充盈今打箭爐專運章谷久將木池軍糧停止且時方冬令烏拉歸巢勢亦不能催覓現在止由雜谷一路照常運供舊糧日支之外既漸減少而以後照新定章程酌辦亦無虞壅積奏入

上諭軍機大臣曰阿桂等酌議軍營備儲糧餉等項亦

只可如此辦理現在籌定分路尅日進勦以期迅速
深入則糧運各項愈進愈遠護糧夫役最關緊要前
經傳諭富勒渾等妥選強壯夫役練習器械發行如
州縣之設立民壯亦足以資捍衛昨已據富勒渾等
奏稱遵旨通飭選派惟在該督等董率糧站各員酌
量緩急隨時通報

同日文綏奏言查續調楚兵三千共分六起行走
每起五百名於十二月初五日頭起行抵成都昨

准阿桂來咨已

奏明將一千撥起南路俟前起一千到省即令赴南路軍營其續到二千飭赴宜喜此時口內口外人夫糧草久已寬備又先期飭行各站妥速應付凡道路稍平可以併站之處兼程前進至豐昇額已定由丹壩進攻則此項楚兵在卓克采陡柔總路聰調不必直到宜喜致多往返臣已飛飭豐昇額酌定取道何處即檄帶兵將弁遵照奏入報

問

久定四庫全書曰

平定兩金川方略

九

平定兩金川方略卷八十三

欽定四庫全書

平定兩金川方略卷八十四

十二月壬寅陳輝祖奏言查川楚地界毗連而相距尤近之地惟北省之荊州襄陽宜昌及南省之常德一帶由水路下趨荊州赴川更稱便捷臣擬將滿漢官兵酌分水陸兩路入川現在飛咨署將軍書明阿選撥兵一千名派分五起照緯和諾之例令其步行入川所需夫役飛飭各站預脩運送

其綠營之兵卽於宜昌襄陽常德提鎮標內派兵一千令州縣等預脩船隻分由水路行走至摧碉破卡究以火器為先此一千兵內派有鎗兵六百名並於洞庭宜昌水師等營烏鎗內酌量分撥攜帶至水路船隻每船加添夫三十名令各兵輪替牽挽前進至巫山縣登陸卽隨滿洲兵進發奏入上嘉之

癸卯豐昇額奏言臣於十二月初三日由宜喜起

程初五日來至格江接得阿桂咨稱西路擬從谷
噶凱立業進兵令臣等或由丹壩或由穆爾津岡
自行酌定臣查由綽斯甲布之宜喜日旁甲索俄
坡等處均係樹木叢深道路險窄進兵既為無益
臣復將穆爾津岡等處詢問經過之人俱云兵丁
可以行走但兵少不免稍有沮滯等語臣現在統
兵三千三百名再添湖廣兵二千共計有五千餘
兵俟阿桂兵到谷噶時彼此約定日期一同攻取

奏入

上諭軍機大臣曰朕昨已降諭旨令明亮等於本月二十八九等日進兵今豐昇額即依所奏由穆爾津岡前進並移知阿桂令其相機策應將此諭令阿桂明亮知之

同日明亮富德奏言查馬柰馬爾邦一路先經臣等派令都司崔文傑前赴巴旺布拉克底與該土司等面商茲據崔文傑回稱連日從長計議咸稱

大兵尚駐僧格宗一帶金川必料仍從當噶爾拉
進攻竭力守禦至此時馬柰馬爾邦與小金川未
破以前情形各別現在投審屢由此路脫出即使
官兵不來金川豈有不防我等乘空搶奪若止仗
正面兩路進攻難以得手令派頭人先往東西兩
邊山後探明抄截之路再來回稟現有脫出革布
什咱番人聶噶可問等語臣等親訊聶噶據稱僧
格桑已被金川拘禁若使其言果實則金川頭人

等深知畏懼并力攻勦更為得力臣等思馬柰馬爾邦勢在必進現就崔文傑所繪地圖僅能彷彿大概然河南之深嘉卜溝河北之駱駝溝均有間道可以繞截今巴旺等土司既派頭人偵探道路應俟其回日稟明再定現將各要隘加意防守並每日特派官軍於相近當噶爾拉地方四出巡邏既可牽綴賊勢并絕其暗行窺探將來大兵撤赴章谷由格藏而進自屬出其不意奏入

上諭軍機大臣曰據明亮等所奏與朕前此指示適相
昭合功噶爾拉當噶爾拉兩路今歲攻已半年險隘
難於寸進若由馬柰馬爾邦間道前進庶可攻其無
備今閱奏到地圖河北之馬柰馬爾邦一帶路徑較
寬進攻自為稍易明亮奎林等當努力妥為之又據
奏聶噶供稱僧格桑已被金川拘禁等語其言果實
則金川頭人等心生畏懼或至窘迫時竟將僧格桑
獻出亦未可定但即使真將逆酋縛獻亦暫且只可

將計就計留其俘獻並設法誘擒護送之賊目等無
使一人脫回仍即照舊統兵攻打無稍遲緩其餘各
路將軍或有賊人詭稱已在某將軍營門縛獻逆酋
得蒙寬宥者將軍等總不必問其事之虛實仍將來
人設法擒獲一面領兵攻勦毋為虛言所惑則賊衆
詭譎之計將無所施而在我得操必勝之勢可期尅
日集事

同日明亮富德又奏言查汗牛十四寨投番臣等

先派叅將許世亨前往清查戶口現據回稱該處
番人自本年打仗陣亡及被金川抄沒隨處逃散
之外實存三百二十戶男婦大小一千四百八十
名其中老弱婦女居多就其年至十六以上五十
以下即作為壯番挑選亦僅得二百五十名仍將
大頭人押赴打箭爐交與明正土司管束其壯番
挑帶隨征餘仍留該處安插臣等酌派明正土兵
二百名在彼暫為彈壓奏入報

聞

同日舒常奏言查豐昇額於十二月初三日領兵三千三百名自宜喜前赴丹壩臣即赴各營卡察看布置或令兩營歸併一營而於空營加柵少為駐兵多起爨煙並嚴飭弁兵加意防範至各處土兵臣亦嚴加曉諭察其情形頗屬安靜現在宜喜有兵二千三百餘名泥峙岡有兵五百名日旁有兵二千五百餘名足敷牽綴之用臣謹遵

諭旨常作進攻之狀或見賊人稀疎處所即行攻勦或
夜間施放鎗砲併於賊人望見處搯演兵丁使不
知我兵虛實晝夜隄防至覺木交一帶後路糧臺
久經鄂寶酌派官兵駐守八月間復經臣豐昇額
舒常奏撥宜喜兵三百名添防後路更為安靜無
虞奏入報

聞

甲辰阿桂色布騰巴爾珠爾奏言金川賊人前來

投稟稱僧格桑現在拘禁官寨患病沉重請差一位大人前來我即將僧格桑全尸獻出至頭人七圖安都爾末利阿什咱聞已為小金川百姓所殺我地方上實無其人等語臣等思賊番狡詐百出僧格桑是否病重斷難憑信且謂小金川頭人已被番人殺死其為容留逆目更屬顯然況又請大人前往其意必要以撤兵完事方始送還實為可恨可惡此不但決無遣人前往之理即使獻出僧

格桑并送還頭人番衆而此罪大惡極之逆酋萬
無可宥其稟詞狂吠自不宜與通言語但逆酋兄
弟既出此言已覺心存恇怯其拘禁僧格桑實不
無希冀獻出完事之想臣等仍令特森額特給與
檄嚴加斥責查大兵此時分駐美諾及底木達布
朗郭宗等處尚無動靜賊正不能測我意指若又
間與之以回諭賊人非揣我此時尚須等齊兵力
即疑

天朝或有得僧格桑歇手之心遲回觀望預脩稍疎便可乘搶奪佔一二處以圖突入至進兵道路機宜密之又密卽鎮將等不得與聞賊雖屢來卡外亦不虞有窺探漏洩之弊

同日阿桂色布騰巴爾珠爾又奏言臣等將谷噶一路詢之三等侍衛穆塔爾據稱谷噶道路崎嶇樹林深密但係未經攻勦之地較之昔嶺功噶爾拉自當稍易若密派精兵晝伏夜行猝然攻佔或

可望其得手等語臣等察其所言頗為合理此時已派官兵數百從登春獲拉角克美卧溝直抵大板昭曾頭溝等處作為查搜林箐捕捉逃亡之狀仍即撤回使賊無從窺測而官兵等借此於小金川交界地方察看山勢情形雖不能直入逆酋界內探其險易而大局既知即可為虛虛實實聲東擊西之計其自美諾而至谷噶計程約有八九站若令各處分駐之兵撤回前往賊人窺破即無難

於兩三日間將谷噶一路要隘悉行防守臣等再四熟籌此時海蘭察等帶在木底達布朗郭宗之兵已有萬餘再於各處存兵內挑選精銳酌於定期之前密令官兵夜間潛往而附近功噶爾拉等處之兵仍令其逐漸移營多舉煙火虛張聲勢使賊人注意於此俟我潛往谷噶之兵佔得要隘再撤功噶爾拉一帶分布之兵并力赴彼合攻可期

深入

同日阿桂又奏言查豐昇額現擬帶往丹壩官兵
自西安滿兵雲南陝西兵三千索倫兵三百及將
次抵營之楚兵二千外其丹壩原駐之漢土官兵
二千餘名即可為丹壩一路進剿之兵而署總官
官達色夏間帶往雜谷分防之漢土官兵一千九
百名豐昇額移兵丹壩之後並可調用其原調在
綽斯甲布之三雜谷土兵一千將來亦可調往丹
壩伊等由本地進攻更為得力此時賊人四面堅

守不論何路官兵攻破要隘其餘皆為有益如豐
昇額一路實能銳進臣等即派勇幹大員帶兵馳
往協勦現雖分兵數路實則同辦一事斷不敢稍
存岐視之見均奏入

上諭軍機大臣曰賊人投稟敢於如此狂吠真堪髮指
逆酋以臣服土司竟敢負恩反噬實為

覆載所不容此乃賊衆惡貫盈滿

天奪其魄使之肆為狂吠以速滅亡金川之應勦滅於揆

之理勢均難終止若使稍涉游移賊酋必盡將各土
司蠶食并成都亦且可慮更復成何事體思及此尚
可存不辨之說乎今滿漢屯土各兵已調至七萬有
餘阿桂如尚以為不敷分用即奏聞再添兵一二萬
亦非難事只要大功必成多費實所不惜現在所撥
軍需銀兩約算可供至來年三月又因川運開捐約
計可收千萬是明歲一年之用寬然有餘至阿桂令
額森特給以回檄在彼時兵駐美諾尚無妨間用權

宜使其不能揣測迨至進兵之後賊或復至營門具稟無論其是否借僧格桑以為詞總宜置之不理並立將其賫稟之人設法擒獲如稍涉緊要之犯者即交文綬派委妥幹員弁管押解京訊究且一經進兵即當宣示各土兵令其傳播此次勁旅雲集分勦金川惟當乘勝兵之力約會進攻務期擒殲索諾木并及其兄莎羅奔等方完此局並非僅欲擒捕僧格桑此時金川即將伊獻出已屬遲延無裨於事賊酋更

何必借此以為欺誑如此則可以破賊居奇之意並可杜其狂誕之詞至豐昇額現赴丹壩一路伊所帶兵數不過三千餘尚覺單弱曾諭其即得碉卡只可在山梁駐守不宜輕進仍須通知阿桂及色布騰巴爾珠爾等如彼處有續到之兵方可會齊進剿着再傳諭豐昇額務須慎重妥酌而行

同日阿桂色布騰巴爾珠爾又奏言查進兵道路臣等久已留心體訪據頭人土弁等稱美卧溝形

勢雖非甚險而進至相近賊境之勒烏溝林樹叢深並多坡礪最易潛來繞截大軍由此前行不能便利且後路綿長難於接續其大板昭一處賊人來路即係谷噶等處現擬進攻之地此時籌辦進剿後路必期無虞前進必期深入而已叛復降之番亦必盡為安頓不使再生事端方為妥善誠以賊酋詭詐多端務須倍加慎重計出萬全固不肯稍有遲延亦不敢畧為疎忽至此種降番內男女

屬眷已移往土司屯弁地方分別安插其精壯之人仍令來營打仗安插何處即入於該處土兵內令其頭人管領查屯練及瓦寺木坪鄂克什土兵其數均倍於降番自屬易為鈐制且前此降番滋事皆因家口尚在本寨而此次番人亦因不及挈眷竄逃所以仍舊投誠今各番家口既分散在數百里以外伊等各有顧戀之心無虞再行逃遁奏入報

聞

同日阿桂色布騰巴爾珠爾又奏言小金川各寨降番聚處易於生變必須分散各處使其勢孤力弱始不能復行滋事但須就其地之遠近人之多寡以為分撥又須各就土司戶口多寡分別賞給臣等將彭魯爾各寨及覺寨番人共六百八十餘名口均交瓦寺土司管束瓦寺距美諾二十餘站自不能潛歸故地至木坪人戶雖少附近內地業

將山扎舍壘等寨五百六十名口交與該處安置
其底木達曾頭溝等寨若亦發交瓦寺木坪則路
遠人多恐難照料自應於雜谷腦五寨內附近內
地之處交與屯弁管束既與相聚而居斷難再行
竄逸是以撥往一千九百餘名至鄂克什土司本
地番戶稀少且逼近小金川地方賞撥過多轉恐
不敷彈壓是以僅撥二百八十餘名交其管轄其
餘零星寨落戶口賞給巴旺布拉克底二十九名

革布什咱二十八名該番等分別遷徙時抑或即
令屯土各兵押往或酌派綠營官兵同行降番等
扶老攜幼欣然願往并無一人逃逸且木坪土司
甲爾叅納木卡瓦寺土舍薩朗雍中及屯阿忠人
等咸稱降番安插之初所有住居房屋開墾地畝
均願為之幫助伊等更可得安生理至穆塔爾於
一切差使盡心奮勉前此隨往底木達等處招撫
各寨亦得其力本應稍示優異但小金川全地此

時並無居人伊亦不便仍居故寨而伊叔索諾木
原係別斯滿一寨頭人此次大兵一至即先投到
並協同擒勦多人具見誠順今穆塔爾欲攜其屬
番隨同伊叔居住因將別斯滿五寨內之木爾思
嘉大壩尼等寨番人給其管理其餘漢瓦色爾木
覺木等寨查有屯練土都司阿忠保在南路督率
土兵打仗最為奮勉即令其管轄此別斯滿五寨
番民與穆塔爾屬番亦共有六七百名口統計臣

等西路所收降番幾四千有餘並臣阿桂前在南
路安插明正巴旺布拉克底之一百餘名及明亮
等所收宅壘思鳩兩寨一百五十餘名此時均已
安插全竣再上年查清小金川降番共有八千餘
人今除此四千餘名口外汗牛十四寨此時約存
一千四百餘名是小金川全境降番約計已有六
千而本年六月間臣阿桂在南路派兵四出誅殲
並其婦女賞給巴旺布拉克底者又不下一千數

百人合以舊數計小金川人之在金川者不過千
餘臣等於查點戶口時先將精壯之人逐一註明
飭交各土司等將其家口安定即押來營隨同攻
勦彼時竄留金川之小金川番人見其同類均已
得生或有妻子留於本寨者詢知遷徙之餘亦皆
無恙則投出者必多自不慮其轉同金川死守奏
入報

聞

同日阿桂色布騰巴爾珠爾又奏言三雜谷土司
於十二月初三日派兵一千五百名來赴美諾大
營臣等語以

天朝恩典深厚且近日加封名號賞戴花翎榮幸已極
爾等應思如何出力或誑誘賊人多為勦殺或察
看道路進搗其巢實有一番自効之處方見誠心
該頭人等聞言均各欣喜奏入報

聞

同日富勒渾奏言西南兩路軍營剋日移師進剿一切糧運道路均應預為籌辦臣前此所調官員夫馬陸續到齊一俟大兵定議移營不拘由何路進攻即將新路各臺妥為安設俾得糧隨兵轉不致稍悞機宜奏入

上諭軍機大臣曰富勒渾奏俟定議移營即將新路各臺趕緊安設等語所籌未為妥協現在新定之馬索馬爾邦及谷噶凱立葉各路原係間道前進攻其不

脩非若當噶爾拉功噶爾拉之牽綴賊勢故作聲張者可比昨已諭令阿桂等於臘月二十七八等日擇吉進兵為期甚近須俟功噶爾拉當噶爾拉之兵到彼虛張聲勢使賊盡力拒守然後從間道分兵前進於事方為有益若官兵所至即已尾隨安臺賊人聞之轉得預為准脩所關非細所有新路進攻之兵起程時自應酌帶口糧兼程而進俟攻得地方後再就各路近處續運軍糧方為妥善着傳諭阿桂將如何裏

帶之處速行妥辦仍密為通知富勒渾毋稍踈畧貽
悞

已酉明亮富德奏言臣等自定議進攻馬柰馬爾
邦以來因該處相通間道未能深悉必須確實探
明始可通盤籌畫茲據探路頭人雍忠爾結來營
稟稱河北馬柰山勢險惡難以進兵惟從駱駝溝
內繞道前進截出馬柰卡卡角之前最為得勢其
河南前敵博堵之上地名思覺極關緊要必須一

併攻克則直逼克丹九寨更為扼要等語臣等查大營現在僧格宗一帶駐扎與西路聲勢聯絡賊人第知於當噶爾拉增兵設守其馬柰馬爾邦雖築有礮卡未必即慮我兵從此而入但其狡獪伎倆必密於山峰高處四出窺伺倘見我兵一動勢為先往聚守臣等商從駱駝溝發兵兩路一取馬柰一取卡卡角俱從山梁下壓一面即由馬柰對河之格魯克古卡卡角對河之木底用皮船渡兵

分往上下夾攻而迎面正路官兵亦即直前進戰其河北博堵地方一經攻克即迅往搶佔思覺扼其要害似此數路發兵賊人縱有覺察亦不知應防何路乘其措手不及時奇正相生分頭並進攻之自可得力臣等擬俟思覺一路查探明確即知會阿桂酌定日期量其路之遠近先後密為進發同日豐昇額奏言臣行抵丹壩親同五岱覓勘進兵之路惟穆爾津岡道路險峻山頂礮卡接連詢

知去歲平定小金川後賊人添造防守臣等擬出其不意由小路猝然而上將山頂佔據往下壓擊賊衆自不能支現在先於索倫兵內密派謹慎之人前往探路計所調之湖廣兵二千將次到來可以奮力進取再宜喜調來兵丁三千三百名若即派往丹壩使賊先期知覺適以堅其守拒臣等擬於進兵前一日始將此項官兵在丹壩地方住宿庶賊人不能先期預備均奏入

上諭軍機大臣曰明亮等奏於馬柰馬爾邦分兵進取所籌甚好諭富德仍往明亮處同由馬柰馬爾邦進兵會勦德福奉諭旨後即趕赴明亮軍營分路並進諒不致誤會勦之期看來馬柰馬爾邦一路既探得從駱駝溝潛進之道且可分兵夾攻以此路更易於克捷又據豐昇額奏現至丹壩察探路徑豐昇額若果攻得穆爾津岡要隘料其地可以自上而下壓取勒烏圍賊寨原可與五岱分前後撥而進或乘其

不脩竟能攻克亦未可定然總不宜稍涉孟浪惟在
豐昇額與五岱隨時妥酌而行朕不能於六七千里
外概為一一籌及也

辛亥阿桂色布騰巴爾珠爾奏言查進勦金川道
路臣等前此密加訪問惟谷噶凱立葉較為易進
惟是臣等帶領進勦及後路一帶官兵共二萬六
千餘名此時美諾底木達擇其最緊要者已分撥
留兵五千七百餘名至從喀爾薩爾前抵谷噶其

中梭洛栢古一處須尚留兵五百名又自梭洛栢古至谷噶溝口及溝口迤北之曾頭溝孟拜拉二處又須各留兵五百名其自溝口至谷噶了口及抵賊碉共計一百餘里樹木深密道路叢雜亦非三千兵不敷駐守是以去兵萬餘據穆塔爾等稱從谷噶前進至二道山梁碉卡始為嚴密若出其不意搶得此處可以下壓格魯瓦覺三寨格魯瓦覺去勒烏圓不過五六十里官兵至此即已下溝

行走若不佔據格魯瓦覺之北凱立業一道山梁
恐賊人穿林越箐憑高繞截則後路甚屬可虞必
須再派官兵由薩爾赤鄂羅山同時分佔凱立業
山梁則不但谷噶一路可以前進無虞而凱立業
若有多兵循山而下直至河邊則作固頂以下賊
人碉卡已經隔斷在後而穆爾津岡之險不攻自
破賊必不能固守但止從凱立業前進而谷噶無
兵亦恐賊人翻過山梁截斷後路是此二處必應

並進分攻第臣等進至谷噶後僅存兵一萬五六
千名若分兩路每路只有八千而薩爾赤鄂羅山
一帶又須留兵防駐萬萬不敷前進查凱立業一
處即豐昇額摺內所指穆爾津岡之南山據稱業
經訪得但恐兵力不敷等語查從前岳鍾琪在丹
壩進攻彼時穆爾津岡尚為賊兵所據然攻至年
餘未經寸進此時進攻亦難望其立時摧破況即
得穆爾津岡尚須攻過康巴達以至凱立業迤下

地方始能前進今若佔據凱立葉則直出康巴達
之前自更為捷便臣等昨奉

諭旨現在谷噶凱立葉俱係通勒烏圍之路距丹壩不
遠阿桂到後或該處有可進情形不妨酌調豐昇額
速赴谷噶等處籌辦查賊人狡惡異常若俟臣等到
彼攻打之後始行酌調豐昇額前來則凱立葉一
帶地方早已防守嚴密自不如乘此大兵未動賊
人毫無知覺之時令豐昇額即從凱立葉進攻庶

為得力查豐昇額現已帶新兵三千三百名其湖
廣兵二千約於歲底春初全到是已有兵五千餘
而五福原帶駐守丹壩之漢土官兵二千餘及署
總兵官達色舊住梭磨等處之一千九百餘名內
尚可抽用二千名約共可得七千臣等再酌量幫
給兵力約可敷一路之用且豐昇額現駐之處詢
問道路至凱立葉不過四五站而凱立葉與谷噶
分路之處相距亦止三十餘里定期密約帶兵會

合從此併力進攻仰仗

天威可望得手臣等實因此時攻勦金川並無妥捷之路惟此二處賊人防範尚不嚴密道路亦為較易而就現有兵力既不敷兩路之用且亦更無可調之兵即有新調官兵亦斷無坐待數月之理是以將兩路情形悉心核議為此並進合攻之計冀收剋期深入之功

同日阿桂又奏言臣克復小金川後探知金川賊

人業已嚴為防備因思此地情形不能專用力攻
必須仍兼智取前因功噶爾拉當噶爾拉等處既
無可進之理而各處道路形勢尚未探知胸中實
無成竹嗣雖訪得谷噶凱立葉二處而究竟孰為
妥捷亦不得不再三確訪且事關機要多有未可
顯然辦理者又不得不輟轉設法稍需時日其未
經安插之投番為數衆多又須陸續分起管押赴
各土司地方不令其稍有滋事至各路糧站進兵

之始酌量仍由底木達一帶輓輸及進兵之後擬從楸砥運往價脚既多節省而糧路亦易於照料但該處道路尚俟開修此時又不便遽修以致賊人知覺又須限定日期屆時趕辦且即日進攻亦必照前抽調兵丁晝行夜伏不令舉火密速進行糧運斷不能趕上前已飭令多備乾糧以資裹帶而麵斤尚未辦齊全實無一事不須再四講求親身經理且昨據豐昇額扎稱該處亦須等候楚兵

而楚兵十二月初七日始自省起程計至丹壩須
在歲底又准明亮咨送摺稿稱巴旺布拉克底現
派頭人前往偵探間道亦俟回日稟明方能得辦
查賊衆本屬無多不果在伊境內就近抽調往來
支應總俟大兵攻打何處緊即便抽他處賊兵前
往抵禦是以必俟各路辦理齊脩同日會攻至美
諾一帶不擬設兵駐守原非萬全之策實因臣等
既已移兵谷噶而明亮等復從馬柰馬爾邦進取

中間相隔至有五百餘里若當噶爾拉功噶爾拉
俱派官兵往綴計必各需兵四五千即僅留守山
口亦非各有兵三千不可況功噶爾拉既已留兵
牽綴則美諾為各路總匯之地亦必有兵聯絡其
美卧滿亦如是已去兵一萬數千而自大板昭
瑪爾當以及由谷噶前進又須酌量留防則攻剿
之兵所存不過萬餘至如南路議改於河南河北
進攻昨明亮來札稱即欲盡撤當噶爾拉之兵臣

告以此時議於當噶爾拉牽綴者不過為暫時之計使賊人注意於此而漢土官兵轉從河南河北分襲馬柰馬爾邦及博堵等處一經搶獲仍將當噶爾拉官兵或撤歸博堵或撤歸馬柰馬爾邦並非久於駐守若使常駐當噶爾拉亦必須數千人而東起科多南至章谷所留兵衆又去數千則於河南河北分進之局亦不能辦况橫亘五百餘里皆駐防兵即皆安臺站而自桃關至美諾一帶臺

站更不能捲撤人夫官役又添數倍所糜帑項實多臣日夜圖維不敢瞻徇衆論是以酌派三千人住守鄂克什其餘各處竟不設兵不惟省兵且多省臺站人夫之用況將來達木巴宗日隆存糧運竣運道改由楸砥則後路已在梭磨境內南路以章谷為後路亦在明正境內均距內地甚近即酌留策應之兵已不至於疎失而竄在金川之小金川番人合計婦女老稚不過千餘斷不能出而復

踏舊巢即汗牛一處已經明正土司派出頭人帶
兵駐彼彈壓并將其大頭人等眷屬移往打箭爐
約束所有精壯番人盡挑赴明亮軍營自必無從
引誘查美諾係臣兩次攻克之地苟非萬不得已
安肯棄而不守實因如此籌辦多省一後路之兵
即可多一進剿之兵而一路既有可進之勢即各
路皆有可進之機殫心畢力聚於一處或可望奏
功誠如

聖諭不入虎穴不得虎子是以為此併兵直進之計恭請
聖明訓示原不能處處周妥今仰荷

指示美諾一帶仍派大員設兵駐守謹將西起科多美
諾東至喀爾薩爾所有應需防守兵數繪圖貼說
恭呈

御覽臣即飭令留守後路之成果常青王進泰遵辦均
奏入

上諭軍機大臣曰阿桂回奏各摺其籌辦谷噶等處進

兵情形一摺請令豐昇額即帶兵往攻凱立葉佔住
山梁賊番人不能潛行翻山堵截谷噶後路等語此
計甚是必應如此辦理着傳諭豐昇額移兵前往凱
立葉佔據山梁方妥至谷噶一路阿桂既以為正路
親自往勦仍當將所有之兵分起派員帶領以次而
進我兵源源接濟聲勢益盛賊衆自必望而生畏至
豐昇額所帶兵五千亦當仍遵前旨令五岱為前起
先進豐昇額在後繼進尤覺得力所有丹壩原駐之

兵仍令五福帶領在彼駐守已足資防截其官達色所帶之兵則隨豐昇額往勦凱立業於彼處留防後路亦為有益至閱現擬留兵駐守之圖其在美諾偏北如喇布寨帛噶爾角克礪一帶皆兩金川相連之境居多又為谷噶進兵後路自應留兵防守若美諾東南之阿爾圖德木達策卜丹沙木拉爾資等處距賊境甚遠且其地尚在美諾營盤之後賊斷不能越過滋事此一帶防兵似屬虛設况兵力聚之則見其

多分之易形其少今此四處之兵多者一二百少者五十若遇勦禦之事未必得力徒令我兵以分見少亦為非計又何如省此四百五十餘名並於功噶當噶湊用為得實濟乎此圖想係阿桂未奉功噶當噶分攻諭旨時所定故爾節節籌辦若功噶當噶既有牽掣之兵則各隘防守又當隨宜酌定著阿桂再行妥酌遇便另為繪圖貼說具奏

臣等謹按防守牽綴之兵所以清後路而分賊

勢務在因地制宜扼其要隘始能得力

皇上於留兵彈壓及牽掣番人奇正互用之道丁寧

垂訓至再至三而臣阿桂奏到駐守兵數之圖則

諭以美諾偏北多與賊境毗連為谷噶進兵後路自應

防守若東南一帶無須虛設

指示既極精詳嗣復

申諭在事諸臣以兵分數少倘與後路無涉不必空費

兵防並當噶功噶兩路可無庸進攻牽綴

化裁通變神運密移絕不稍存成見所以權衡悉當而
諸臣以得稟受集事也

甲寅阿桂奏言查現在豐昇額移兵丹壩會剿金
川或由作固頂或由凱立業此一帶臺站人夫自
必先為籌備查鄂寶原係奉

旨接應豐昇額後路並統領糧儲之人今現在進攻緊
要而豐昇額道途未定一切人夫臺站事宜均有
隨步換形之勢必須大員臨時酌辦鄂寶遠赴丹

東固屬鞭長莫及即仍在覺木交駐劄亦恐呼應不靈必應迅速前來丹壩一帶俟豐昇額酌定進兵之路將軍臺糧站安設齊全或再於適中之地駐扎督辦方為妥協奏入

上諭軍機大臣曰據阿桂奏令鄂寶迅赴丹壩一帶督辦臺站事宜所籌甚是前據阿桂奏請令豐昇額帶兵進攻凱立葉俾賊人不能堵截谷噶後路因即傳諭豐昇額令其遵辦是此一路軍臺糧運關係緊要

著再傳諭鄂寶即在丹壩一帶往來照料隨機妥辦
俾軍儲充裕後路嚴密毋致稍有疎虞

平定兩金川方略卷八十四

欽定四庫全書

平定兩金川方略卷八十五

正月丙辰明亮富德奏言達賴喇嘛班禪額爾德
尼在前藏後藏聚集喇嘛四萬餘衆諷經百日以
彰

天討所加人心無不効順

臣

等前奉

諭旨遵即敬謹譯諭曉示附近南路大小土司今據德
爾格忒巴塘孔塘裏撤麻書納林冲綽窩白立東

科以及明正巴旺布拉克底革布什咱等土司先後具稟咸稱

大皇帝發兵綏靖邊徼即是普濟羣生實從來未有金川自可指日蕩平土司等誠歡誠忭遍及番民各於本境焚香叩祝臣等查各土司向蒙佛教今見藏喇嘛持經誦呪早除凶逆更可作其壯往之氣以成迅掃之功奏入報

聞

同日明亮富德又奏言現在擬於僧格宗留兵六
百名山梁上阿布爾則德烏塘兩處為當噶爾拉
緊要隘口各留兵二百名與僧格宗聲息相通賊
於當噶爾拉山梁即難撤脩其餘如翁古爾壘墨
壘溝策爾丹色木思紐得里各留兵二百名得勝
橋邦科橋各留兵一百名約咱留兵五百名章谷
留兵二千名明知現留兵數尚不足固我籬籠但
賊人長技專以抄截為能彼見僧格宗緊連美諾

料多策應而章谷復有重兵攔阻中間一帶地方
必不敢輕來盤踞就使出而滋擾止放夾壩則現
兵足以制之若擁衆而來已為深入重地臣等正
可痛加勦洗至南路雖少留兵必無他慮查富勒
渾王進泰現駐美諾兼守僧格宗並益以新調荆
州成都駐防及四川湖北綠營兵丁共四千人均
赴美諾聽其分撥則就近翁古爾壘等處自應一
併管理以尚責成臣俟其兵數到齊即將現留守

兵陸續抽回大營以資協勦

同日舒常奏言十二月初十日見達爾圖山梁有

賊積聚

臣

當令施放鎗礮賊亦連放數礮旋即藏

匿十一日辰刻有賊數十伏在密林窺伺我兵取

水之處馬彪烏爾圖納遜即帶兵二百餘名下溝

截殺鎗斃四五賊帶傷十餘賊餘仍竄入礮內均

奏入

上諭軍機大臣曰據明亮等覆奏進攻金川及派兵防

守一摺其馬奈馬爾邦進兵事宜自應如所奏辦理
至籌派兵丁駐守每處不過一二百名勢分而數少
常時既不足以彈壓而設有賊人滋事此等綠營兵
丁徒以力弱見怯於事轉屬無益此實不可謂之得
算但該處情形朕亦不能於六七千里外悉為懸度
或阿桂明亮等謂當噶爾拉功噶爾拉必不可攻若
攻之轉有損無益且能預信此兩路不進兵牽綴可
以保無他患不妨切實陳奏朕又豈肯違衆意而強

人以所難乎又據舒常奏達爾圖山梁有賊積聚窺伺我兵下溝截殺鎗斃四五賊等語此必賊人示我不懼之意實為可惡或賊人在彼試探如見我兵勢弱竟出而滋擾亦不可不防舒常現駐宜喜所統綠旗兵尚有四五千攻勦即或不敷而防守儘足應用舒常務須時察探並將帶兵勦賊之員及應用兵數預派周妥設或見有賊踪即令帶往掩擊尤須斷其歸路杜其來援多為殲戮賊衆偵之喪膽知懼如此

數次賊自不敢復出窺伺

同日顏希深奏言豐昇額於十月初三日起程前赴丹壩所帶官兵亦已分起陸續前進惟鉛彈火藥為軍營急需覺木交所貯頗屬寬裕茲除本營酌留及各兵裹帶外其餘現已撥夫運送至丹壩軍糧鄂寶前往督辦諒無貽悞查綽斯甲布一路木池周叟二站尚有存米一萬二三千石足資宜喜等營兵食倘丹壩軍營內地運供糧石或一時

緩不濟急尚可酌盈劑虛就於近周叟酌撥接濟
奏入報

聞

戊午豐昇額鄂寶奏言十二月二十一日阿桂寄

札令

臣

豐昇額由凱立葉進兵

臣

思移兵丹壩原

期覓路進兵如果攻取作固頂穆爾津岡即能乘

勝深入雖阿桂將

臣

調赴別路

臣

亦斷不至中無

定見依附而行今觀阿桂所言攻取作固頂穆爾

津岡仍須由凱立葉前進則不如即由凱立葉進
兵為是臣復訪詢情形均稱丹壩可通凱立葉但
乾隆十三年岳鍾琪從此進兵作固頂穆爾津岡
俱係我地過此則係達斯噶我兵自山下經過賊
衆滾石下擊我兵竟難前進此次作固頂穆爾津
岡現被賊人佔據則此路尤不可行若自丹壩啟
行由卓克采前往凱立葉約計旬日可到但由此
路前進至卓克采現有糧臺過此則須裹糧而行

今鄂寶已奏明前來丹壩辦理糧務臣一面進兵

鄂寶一面安設臺站可以陸續供支惟是臣自宜

喜帶來之兵止有三千三百名再將五福駐守丹

壩兵內抽撥六百名官達色駐守黃草坪兵內抽

撥三百名及未到之楚兵二千名統計僅有六千

餘名及至凱立葉尚須留防後路要隘則打仗之

兵更形缺少阿桂札言酌量幫兵若撥給三四千

名方可足用奏入

上諭軍機大臣曰豐昇額奏現已由丹壩卓克采一帶
前赴凱立葉但所帶兵數不敷若能幫派兵三四千
名庶為有濟等語着阿桂通盤籌畫量為幫派至丹
壩各路留兵守禦原恐賊人潛出滋擾不可不防若
與官兵後路無涉即不必空勞兵力賊人竄出之路
豈能悉為截堵况用兵之道亦不過守其要隘斷無
逐步攻圍水泄不通之理此不獨丹壩一處為然即
宜喜日旁及各軍營凡有應行防守之兵均宜照此

籌辦至鄂寶所辦係綽斯甲布一路之糧程站已不
為近若三雜谷一帶則相隔更遠行途多費種種非
宜阿桂現統兵前赴谷噶一路所需糧餉自必隨行
今豐昇額既與之會兵一處且凱立葉距谷噶僅一
山梁為程有限自當就用富勒渾郝碩等所辦糧餉
方為妥便鄂寶無容遠涉至前因阿桂請示師期已
諭以二十七二十八均屬吉期可用則其奉到前旨
自可如期起程今豐昇額二十二日所進之摺據稱

即往凱立葉想不過五六日可到而阿桂自美諾前往谷噶程期亦不甚多其馬柰馬爾邦諒亦可按日而至約計各路官兵會期進勦只在正月初旬之事一經得利奏捷必速將此傳諭知之

己未郝碩劉秉恬奏言川省軍糧均係督運米石至麪斤一項向因難於久貯採辦較少而於裹帶則最為便捷蓋以每米五升計重八斤僅敷五日餘之食若帶炒麪八斤每日一斤即可果腹已足

八日之食且麪性細軟易於裹帶或先期作成乾糧或臨時用水和食既省炊爨之煩我兵襲擊時於登山陟險攜帶尤為輕便此次克復小金川即得炒麪之益現在進勦金川將軍阿桂帶兵一萬數千每兵裹帶十日之糧約需麪十七八萬斤因即商同建昌道白瀛上緊籌辦業已有盈無絀現飭糧員運往底木達存貯以備臨期裹帶奏入
上嘉之

同日阿桂奏言臣欽奉

諭旨令奎林富德等徑分功噶爾拉當噶爾拉進攻臣

以現有兵力計之臣處官兵共有二萬六千應於

美諾底木達等處及附近谷噶之後路留兵萬餘

所存一萬五六千人自不能再撥數千由功噶爾

拉等處進攻以分賊勢而明亮處官兵共二萬人

除分防各處止有兵一萬餘人現在明亮酌議於

當噶爾拉各隘駐兵一千名亦僅敷哨探不敷進

攻之用是以臣前奏於附近功噶爾拉以及登春牛廠等處多舉烟火多張聲勢牽綴賊人其南路情形亦復如是至小金川全境必藉能事大員彈壓督率美諾固為遠中之地而底木達布朗郭宗亦為接應谷噶緊要之區常青一人兩處照料仍恐鞭長不及尚須另派大員接應至僧格宗係四面受敵之地其碉寨本在山麓近經燒燬即欲設兵須駐在山梁之上方為得勢且須熟於該處情

形者方能料理總兵英泰叅將汪騰龍在南路日久應於此二員內派留一員駐扎似屬有益並札知明亮商辦其俄坡一路難以前進之處業經豐昇額探明具奏且豐昇額處止有兵五千名往彼進攻斷不能得力而凱立葉一處形勢既為較便聲息亦屬相通於此前進可以直據薩爾亦鄂羅山從上下壓臣實因進勦金川各路中惟此兩路尚可望其得手而此兩路中又必分途並進始為

有益若復一失此機其勢更難是以不敢稍有拘
泥現又飛札豐昇額令其前來凱立葉合攻以收
深入之益奏入

上諭曰辦理此事原不易今既進兵觀汝等何以奏功
慰朕耳

同日阿桂色布騰巴爾珠爾奏言

臣

等於一切進

勦事宜現已料理粗備其米麪人夫約計月初均
可接濟至抽撤各卡官兵已連日分起密赴底木

達一帶駐守且於谷噶一帶形勢或併力同攻或
分兵統截均與統兵大員詳密籌定而各官兵亦
人人思奮今擇於正月初一日密往底木達初六
日即從該處發兵雖距谷噶尚有五六站臣令軍
士兼程而進累帶乾糧不許舉火定於初十日從
谷噶了口進攻務期深入其豐昇額明亮等兩處
已飛檄知同時並舉而舒常宜喜軍營亦囑其駕
馭新土司多派土兵奮力攻打以收牽綴之益奏

入

上諭軍機大臣曰據阿桂等奏定於正月初十日各路同時並發所辦甚好佇聽捷音又據稱官兵撤赴底木達俱令裹帶乾糧不許舉火自應如此辦理至所稱僧格宗章谷一路應於總兵英泰叅將汪騰龍內派留一員駐扎即着派英泰在彼實力妥辦

庚申桂林奏言鄂寶咨送摺稿派臣兼管丹東後路查丹東一帶為革布什咱要區逼近金川處處

皆通賊境必得東員駐扎實力嚴防方為有備今
明亮等已定由巴旺布拉克底分路進攻所有一
切軍需及安設臺站等事臣均須預為籌辦既不
能分身復駐丹東兼籌防範即鄂寶在丹壩辦糧
亦斷不能仍赴丹東照料且軍臺一切輓輸必須
往來其間親自目擊乃可隨地變通而駐防後路
則又須坐守其地方使無間可窺此督儲與駐防
事理各殊萬難兼顧相應請

旨勅下明亮另派專員前往駐扎奏入

上諭軍機大臣曰丹東一帶後路亦關緊要必須大員
專駐嚴防着傳諭文綬於在省大員內酌派妥幹一
人速赴丹東駐扎防範毋得稍有疎忽

同日阿桂色布騰巴爾珠爾奏言

臣

等派出官兵

由簇拉角克美臥溝一帶直抵大板昭魯頭溝等
處一面察看道路情形一面搜捕林箐逸番當經
保寧成德等殺死賊人一名並送到拿獲番人和

爾嘉及番婦阿和阿朗二名訊係被賊帶往金川
旋又回來尋覓口糧被兵拏獲其所聞僧格桑拘
在科思果木及其小女人別在勒烏圍官寨與向
來番人所供相符再該鎮等偕搜查之便已同海
蘭察將金川連界地方道路探知梗概若仍於曾
頭溝大板昭一帶駐扎該處與谷噶凱立葉相近
恐為賊人所覺預先防守臣等仍令其撤歸底木
達大營使賊無從窺測以便猝然由彼前進

阿桂色布騰巴爾珠爾又奏言臣等接奉

諭旨以豐昇額奏俄坡一路山大溝深難於徑進臣詳悉覆奏竊念當噶爾拉形勢本為陡險而功噶爾拉尤為山峻礪堅雪深路仄此二處不獨攻勦甚難而後路綿長即牽綴亦殊不易是以臣等從前籌議於谷噶凱立業以及馬奈博堵二處為併力合攻之計查南路河北之馬奈馬爾邦本係巴旺布拉克底之地而河南之博堵亦係該土司等

舊壤過此即克舟九寨地方若從深嘉卜繞出襲
取博堵並能佔住思覺則克舟九寨不難分搶而
得便可直抵僧達既得進攻噶拉依之正路而當
噶爾拉賊人難於存立必將不攻自潰其河北馬
奈馬爾邦番人均係巴旺布拉克底舊時百姓又
該土司復地之志甚誠屢請派出土兵願為先導
臣等通計金川地方不過八十餘寨若一動兵即
已搶得數寨先可挫其鋒而奪其魄得手之後仍

可分兵渡河與深嘉卜博堵一路之兵併力攻勦
惟是思覺一處最為緊要得思角方可望克舟九
寨是以襲取思角之路現在明亮等悉心躡探竭
力籌算至於谷噶凱立葉兩處路生途遠辦理匪
易臣阿桂自當獨任其難但谷噶第一道山梁礪
卡本少其第二道山梁礪卡嚴密若從此繞越搶
據格魯瓦覺三寨斷其來援之路則第二道山梁
之賊亦可不攻自潰過此至勒烏圍雖有礪寨皆

係據高臨下甚為得勢而凱立葉一路道途易進
豐昇額若佔得薩爾赤鄂羅山梁順山而下則不
獨各卡官兵賊不能從旁阻撓即康巴達格什戎
岡亦被官兵截斷在外而穆爾津岡之賊已不能
與勒烏圍聲息相通即或用船過河以通河北宜
喜等處之賊而河寬水急往來實多不便且官兵
一至谷嘴山梁與凱立葉對面相望砲聲亦可相
聞而穆爾津岡一帶賊人所調設卡皆為向外守

禦之具我兵轉從內奮攻賊必難於抵禦則丹壩
存駐之兵亦可前來合會此兩處官兵實相湏而
不可偏廢前此節奉

諭旨令豐昇額或從丹壩或從俄坡而

臣

阿桂屢次奏

明請令豐昇額前來凱立業並屢次札致豐昇額
不必游移實因身膺軍旅重寄必求於事有濟非
惟不敢稍分畛域亦不敢稍存緘默今欽奉

諭旨以俄坡難於直入丹壩亦非可長驅徑進豐昇額

接奉

諭旨必前來凱立業會攻自可即期深入況前據知府
盛英稟稱綽斯甲布應襲土司雍中旺爾結率其
土舍頭人來見稱聽得金川懇三雜谷代求若獻
出僧格桑即可撤兵完事令綽斯甲布亦與他講
話可保八年十年無事如果大兵必滅金川我們
除已派出三千六百人外更把百姓多派出來別
尋進路誓必奪取山梁等語

臣閱其所稟之詞頗

為真實因即批諭以本將軍不滅金川不休之心
係汝等所深知既欲多派百姓奪取山梁現有叅
贊舒大人帶兵駐札本將軍一定進勦日期知會
到時汝等即可督率多兵奪攻助勦臣等察看綽
斯甲布情形甚為出力若果能奪攻助勦而豐昇
額及臣等之兵又從谷噶凱立葉下至河邊則與
舒常之兵只隔一河從此合攻勒烏圍等處不獨
摧開要隘已可得金川地方之半均奏入

上諭軍機大臣曰阿桂等奏籌畫進剿情形頗見誠心所籌甚善是阿桂豐昇額一路之兵甚為得勢如果能進逼勒烏圍賊番人外險已失必多惶窘自難久於支拒便可掃蕩賊巢擒縛兇豎以成大功指日即屆進兵吉期竭望捷音速至又據稱綽斯甲布土司等情願多派番人搶奪山梁其情頗為真切即諭以督率多兵奮攻助剿等語所辦甚合機宜又據奏擊獲小金川番人和爾嘉供詞其說亦未可盡信但所

供情形與前此訊問番人等供詞均屬相仿看來金川賊衆此時尚視僧格桑為奇貨直待情勢窘迫再行獻出以圖解免或將七圖安都爾等一併同獻其情大率類此但兩金川罪大惡極萬無可逭並非縛獻逆酋所能完局況今各路進兵尤不宜復通文檄設或賊人情急差人詣軍門獻俘求降均宜置之不理一面將所獻賊酋賊目拘留仍即設法擒其所差頭人一併檻解京城磔處示衆一面督兵上緊進剿

各路將軍均當深體朕意切實辦理朕惟早盼喜音之至

臣等謹按索諾木等於小金川戡定後尚敢容留僧格桑以冀隱繫小金川番衆之心若大兵撤回即可倖遂吞併之謀即或情窮勢迫猶可縛獻以邀赦宥窺其伎倆狡獪已極

皇上先已洞燭其奸宄示軍營再三申誡嗣後攻至遜克爾宗索諾木果將僧格桑逆屍及七圖安都

爾等一同獻出


臣

阿桂等得所稟承遂一面解

京一面統兵力勦番酋等咸知詭計難施因得

犁巢掃穴克彰捷伐之勲皆

先幾指示所由收鈴而奏凱也



平定兩金川方略卷八十五

欽定四庫全書

史部

平定兩金川方略卷十八

員外郎_臣顧宗泰覆勘

總校官原任侍講_臣王燕緒

欽定四庫全書

平定兩金川方略卷八十六

正月乙丑明亮富德奏言

臣

等查當噶爾拉山勢

蔓延不能算前鋒綴只可于阿布爾則德烏塘二

處設為疑兵之計

臣

富德與奎林自應同赴馬奈

力圖進取千事更為有濟茲于本月二十八日據

探路番人回稱繞至思覺地方四面瞭望約有七

八十戶實為克舟九寨屏障必須攻克但思覺在

博堵之上路徑雖有三條皆雪深冰滑倍難行走
土兵等感激

天恩情願先取博堵以便搶奪思覺等語

臣

等查河北

馬奈一路前已探明由駱駝溝發兵一取馬奈一

取卡卡角惟溝內路遠山高林深箐密必須逐步

攀越而上繞出最為不易當于布拉克底之臨卡

地方密為進發使不及防其河南博堵一路從深

嘉卜而往難以藏身

臣

等悉心籌畫由墨壟溝越

過甲木山梁有路可通博堵從此發兵更為出其
不意但念河南北各路俱有數日程途官兵移動
究不如土兵趨捷是以先將屯土兵丁照所擬道
路令其分頭先進一面即將滿漢兵丁酌派續進
臣等臨時各就緊要之地迅往督率現准阿桂札
知于正月初十日會同各路一齊進攻茲將地方
遠近扣定日期即遵

欽定吉期于本月二十八日先行整隊起程以叶師行

之吉所有安臺設站各事宜亦飭臬司李世傑密
為布置均可無誤惟正地一帶本為緊要因留兵
二千人僅數守禦而南路軍營又斷難抽兵添往
恐賊人出而滋擾於格藏橋甚有關係臣等密札
副將鄭國卿在革布什咱番戶內再行添募務即
攢湊漢土官兵百餘名帶往甲魯與正地山口交
界處所扼其要害大張聲勢作為進攻之狀使賊
不敢輕量我兵虛實不惟防守無虞且足為牽綴

之用奏入

上諭曰所籌皆合機宜速望捷音之至

同日豐昇額奏言臣前接阿桂札調令臣前往凱

立葉進攻臣現帶官兵三千三百名並抽撥原駐

丹壩兵丁六百名向卓克采進發其餘一千六百

餘名仍交總兵五福副將李天佑在丹壩分防駐

守茲復接阿桂來札約于正月初十日會攻臣惟

有趕緊辦理至期督率將士奮迅直前以期早為

集事奏入

上嘉之

丙寅

上諭內閣曰前因總兵教成補授鎮遠復調赴南路帶兵所遺威寧鎮總兵員缺令阿桂揀員奏補今據奏乾清門三等侍衛特成額自赴軍營以來奮勉學習有志向上海亦能帶領綠營兵弁令其署理等語著照所請貴州威寧鎮總兵員缺即著特成額署理

同日阿桂色布騰巴爾珠爾奏言臣等接豐昇額

來札定于凱立葉一路前來惟是將軍行動易為
番衆傳揚因囑豐昇額先為揚言欲來美諾底木
達等處與各路將軍會合俟至曾頭溝薩爾赤鄂
羅山溝猝然進剿庶使賊人無備但豐昇額處兵
力尚為單薄且豐昇額由卓克采前進經過各隘
口內如孟拜拉腊覺溝各應畱兵二三百名曾頭
溝口亦應設兵三四百名已令官達色於所帶分

駐黃草坪兵內撥出八九百名分駐各處庶後路
可以無虞再三雜谷土兵之在宜喜者共一千餘
名臣等向聞其與綽斯甲布不和畱在該處無益
應令隨豐昇額進勦伊等距其巢穴甚近自必倍
多踴躍而舒常處尚有漢兵四千七八百名又綽
斯甲布土兵三千六百名共計有兵八千餘名以
之牽綴駐守無虞不足臣等又派鍵銳營兵五百
名索倫二百名令與前次所派之三百名合為一

隊又派西安駐防一十名與豐昇額所帶之西安
駐防均歸副都統書麟管轄又派陝甘兵三百名
令侍衛伊達里常保住等帶往扣計路程限於初
十日直取薩爾赤鄂羅山隨同豐昇額一路進攻
聽其調度是豐昇額處已有兵萬餘聲勢更為壯
盛臣等屢將進剿機宜詳悉指示并道路里數繪
圖貼說星馳寄往又派番人二名前往以為嚮導
自能收分路合攻之力至明亮處思覺探路之人

尚未回營并據札知於二十七日自納木覺爾宗
移營前赴章谷俟得思覺之信發兵進剿亦可無
誤此期臣等已將應駐之兵抽撥駐守進剿之兵
皆令夜行晝伏密赴布朗郭宗一帶聽候進發所
有火藥鉛丸及應領乾糧米麪於初五日以前盡
行妥備臣等於正月初一日自美諾起程一至布
朗郭宗即於初六日進發於初十日攻開谷噶了
口為長驅直搗之計

同日阿桂色布騰巴爾珠爾又奏言賊目丹巴沃
雜爾等在卡外叫喚稟話臣等酌令土弁阿忠前
往並授以嚴切之詞預備登答嗣阿忠到卡倫外
丹巴沃雜爾等稟稱伊等土司已將僧格桑拘禁
欲行獻出如大人不信可差一二名兵丁往驗便
知真假經阿忠等告以

天朝威力不難蕩平賊境亦無慮僧格桑逃往何處丹
巴沃雜爾又以實欲獻出僧格桑為詞並言及從

前十三年間准其投降不但岳鍾琪至其境內即
地方官員亦曾來往今不但不見官員入境且兵
丁亦不見來惟恐乞降不允因此懷疑阿忠又斥
以

天朝斷無遣人至爾境之理毋用多言至數日後丹巴
沃雜爾又差人喊稟臣等飭令卡兵嚴斥置之不
理至小金川降番已全移徙而竄在金川者精壯
番丁不過數百人即僧格桑稍延殘喘亦無慮其

出而勾結況僧格桑既已被拘則逆酋之心已離
索諾木等亦不便再為放出此時大兵已克期合
勦萬無中止則逆酋再有稟詞亦不值更為回諭
均奏入

上諭軍機大臣曰阿桂奏分路進兵情形及籌添豐昇
額處之兵丁一摺所辦俱合機宜可謂盡心籌畫而
其為豐昇額添兵一節尤能悉秉誠心不分畛域甚
屬可嘉豐昇額處兵數既多且見阿桂如此體國奉

公更當與之協力同心相機會勦迅奏膚功計自初
十日進兵至今晨已經三日自必所向克捷佇聽喜
音又奏丹巴沃雜爾差人叫喚付之不理所見甚是
從前准令金川投降一節朕深悔所辦姑息今賊酋
敢如此負恩反噬不可不急為勦滅以除後患乃賊
人尚狃於從前受降之說妄思獻出僧格桑即圖完
事而此時猶多觀望非至窘迫之時不肯縛獻實為
可恨各路將軍等總當如阿桂之堅持定見設遇賊

人稟籲竟不必與之交言若送僧格桑到營即并其
送來之人設法擒獲一面仍加緊進攻賊人計無所
施自必易於集事

臣等謹案金川負恩稔惡亟宜勦除以安邊境
斷無再邀寬宥之理乃賊番妄意乞降仍存觀
望

皇上於分路進兵時即

飭諭臣阿桂等堅持定見逆酋稟籲勿復交言惟鼓勵

各路勁兵尅期會剿俾魚釜遊魂不得苟延喙

息實由

廟算先定羣帥協謀用能并力申威一舉蕩平迅除後患以成一勞永逸之功也

同日阿桂色布騰巴爾珠爾又奏言現在尅期進剿所有統領防兵大員自應酌定地方分駐以資控扼並為接應大兵之用查常青熟悉軍務邊情所
有小金川各處留防事宜均應令其照料但布朗

郭宗一帶係昔嶺木果木美卧溝出來之路在在逼近賊境而其後別斯滿溝又有小金川降番尚須彈壓且大兵由谷噶進勦此一帶後路綿長一切接應事宜俱關緊要常青自當於布朗郭宗底木達駐扎其美諾雖係適中之地但距賊境稍遠而王進泰往來美諾達木巴宗等處情形漸悲應令其駐扎美諾至成果腿疾已經兩月既不能隨營打仗若令其幫同王進泰商辦防守事宜尚為

有益再富興脚氣發動甚屬危羸亦應令其在布
朗郭宗帮同常青辦事如常青有往來巡查之事
即令富興留駐辦理均俟痊愈再為調往隨勦至

南路僧格宗一帶前經

臣等

奏明並知會明亮等囑其於英泰汪騰龍內派出一
員統領防兵其科多一站既經明亮先派兵三百
名在彼防守應令派出之員兼管

臣

等西路亦於

科多留兵一百名即令王進泰管轄庶西南兩路

信息相通

阿桂色布騰巴爾珠爾又奏言侍衛桂林來抵美
諾與富勒渾等酌議糧運事宜臣等詳詢情形據
桂林稱此時南路六路分兵一切接濟糧儲隨步
換形皆須親身酌辦既不能前往丹東亦非可遙
為照料現已

奏令明亮另派大員等語臣等於本年七月內惟恐
丹東兵力不敷添派川兵二百五十名令遊擊程

有方帶往幫同叅將郎搢升駐防嗣經明亮添撥
川兵三百名前往吉地以壯聲援近鄂寶又於宜
喜湖廣兵內撥出三百名前往是該處已添兵八
百餘名合以舊有漢土官兵已二千五六百名且
有副將鄭國卿叅將郎搢升及程有方等均係武
職大員是丹東吉地一路惟當飭令該員等往來
會哨實力稽巡竟不必更派大員往駐而南路進
剿道路既多自應令桂林帶領留駐章谷之兵督

理一切糧運毋庸兼顧丹東均奏入

上諭軍機大臣曰阿桂奏令常青等分防後路均著照所奏派辦又奏南路僧格宗一帶已知會明亮於英泰汪騰龍內酌派一員統兵辦理前阿桂奏及此事朕以汪騰龍專務口給不甚足恃因派令英泰駐守僧格宗必須另派大員駐扎自應令富勒渾在彼駐守經理明亮後路事宜令汪騰龍隨其辦事至阿桂軍營糧餉富勒渾仍須實力調度隨時策應第富勒渾

於軍旅素未諳習如遇有關軍務番情者當札商常
青妥為籌酌并當與王進泰相商而行伊三人總當
合而為一和衷妥辦又阿桂奏章谷一帶應留桂林
駐辦之處與朕前降諭旨相合惟丹東一路鄭國卿
僅係副將恐於地方呼應不靈昨已諭令文綬選派
妥幹大員一人在彼辦理著文綬仍照前旨酌派奏
聞

同日舒常奏言綽斯甲布土舍綽爾甲木燦於本

月十六日來營情詞誠懇尤倍往日從前雍中旺爾結曾稟多派土兵另尋攻勦之路查綽斯甲布土兵三千六百名除甲爾壑壩以及撒拉交站三百餘里之內駐守各隘臺站外現存宜喜者一千餘名駐日旁者七百餘名若遇進勦之日實不敷用自應令其多調番人方為有益再豐昇額駐宜喜時攻丹達爾山陰水卡即令三雜谷土兵一千駐守茲准阿桂札知令將土兵撥赴豐昇額一路

以增兵力

臣

查土兵一千俱分駐各碉卡若盡撤

三雜谷之兵將水卡交與綽斯甲布則各碉卡必

致缺兵且現今其助勦之時恐致以人少藉口

臣

再四籌酌因將日旁之兵調取六百名駐守水卡

即派都司袁敏等令其帶領三雜谷土兵兼程前

赴豐昇額處聽用奏入報

聞

同日富勒渾郝碩桂林劉秉恬奏言將軍阿桂等

由大板昭曾頭溝等處分路進勦金川所有添改

臺站趕運軍糧情形

臣

富勒渾於二十四日前抵

軍營

臣

桂林於二十五日由僧格宗來至美諾會

同

臣

郝碩劉秉恬面見將軍阿桂公同籌議查西

路美諾等處俱已派兵防駐糧石現由帛噶爾角

克碯一路運供而布朗郭宗以外新添各站皆藉

人夫輸輓今除美諾一站之夫仍令隨營應用其

日隆以及喇嘛寺每站俱有夫一千餘名酌畱一

半滾運軍米以一半撥置布朗郭宗以外臺站接
遞輓運查自明郭宗至布朗郭宗五站現貯米一
萬餘石灰麪一十五萬餘斤既敷裹帶並有一月
之儲但尤須趕運以資接濟臣富勒渾業飭日隆
達木巴宗糧員將現存米石加緊滾運並將木坪
卧龍關二處存貯之米各長運二三千石用資儲
備一俟楸砥道路開通其日隆達木巴宗之米亦
可趕運完竣即將此路酌留夫馬以通文報其餘

盡行裁撤再查大板昭以外俱係荒僻之所應安
臺站不能預定地方現飭白瀛將官員夫役先期
派定俟大兵前進之後臣富勒渾即同白瀛帶領
官員夫役逐站安設以備轉輸至臣桂林查南路
現由巴旺布拉克底一帶分兵攻取馬爾邦馬奈
則章谷為糧運正路自應仍由打箭爐一帶運供
雖此路比之美諾僧格宗運往較多兩站但僧格
宗等處究與賊境毗連米糧絡繹載途易啓賊人

窺伺今由打箭爐運送俱係明正地方而章谷總
匯之區亦在明正界內較由僧格宗運往實為穩
妥查自章谷至馬爾邦計八大站一切安臺設站
亦須預籌停妥臣桂林同臬司李世傑將現在各
站人夫內抽調安設其缺額換班之夫亦已飭知
軍需局如數趕解來營現在章谷存糧二萬餘石
足備軍儲並飛飭鹽駟道杜玉林將指派南路米
石上緊運赴打箭爐以備源源接濟再查後路駐

兵各處多近賊境不宜另立糧臺莫如約計一兩月之糧運赴該處委員看守按日支放並令駐扎員弁協同防範更為嚴密奏入

上諭軍機大臣曰富勒渾等奏安臺設站事宜所辦甚妥今已派富勒渾駐守僧格宗令汪騰龍隨其辦事所有大板昭一帶軍糧已諭令郝碩劉秉恬前往辦理其督催糧石事宜仍令富勒渾實力調度毋稍岐視貽誤

庚午豐昇額奏言

臣

由丹壩領兵起程於正月初

二日已抵卓克采現擬佔據薩爾赤鄂羅山但計

程尚有四日恐賊人知覺預防且兵丁攜帶軍裝

亦難兼程遄進

臣

於現帶兵內選其強壯者每人

各帶八日乾糧迅速前行其一切鍋帳另派兵弁

照應約於初十日即可攻取凱立葉山梁再查卓

克采以外拉覺溝納雲達等處路通金川

臣

已派

兵一千交副將佛遜帶領防兵奏入

上嘉之

同日豐昇額奏言請於五岱官達色書麟喬沖杓
四人內派叅贊一員協辦軍務

上以五岱為叅贊大臣

辛未鄂寶奏言

臣

於二十一日抵嘉覺查辦糧石

該處存有三千餘石隨即趕赴大營始知豐昇額

又擬由卓克采一路前赴凱立葉進攻但此路距

嘉覺較遠一切供支裹帶均須另辦

臣

於二十六

日馳抵卓克采督辦一切而豐昇額亦於初一日
前來查該處雖無存糧而附近之梭磨站現存三
千餘石足供裹帶至進剿後應安臺站所需人夫
前已飛飭省局作速派撥但豐昇額現當進剿為
期緊迫臣於周叟格江嘉覺等處酌調人夫共二
千數百名現已到齊以之分安新站儘足敷用臣
與豐昇額公同齊酌俟大兵進發即為妥辦不致
有誤軍行至豐昇額現在進攻凱立葉所有臺站

由卓克米一路安設程站較近脚費亦省現即照此辦理奏入

上諭軍機大臣曰鄂寶奏豐昇額現由卓克米統兵赴凱立葉現將梭磨存米飛飭趕運等語卓克米一路所需軍糧或由西路運往或由丹壩供支孰為近便着鄂寶就該處情形據實核辦務使軍儲後路接濟無虞並酌計由西路及丹壩運赴凱立葉何處較為省便即從其最妥者辦理如應由西路關支並知會

郝碩等上緊妥辦不可稍存推諉亦不得畧涉拘泥
期於軍行實有裨益

壬申阿桂色布騰巴爾珠爾奏言

臣

等於初二日

已至布朗郭宗查點滿漢各兵應帶火藥鉛彈軍
械均已齊全及十日裹糧亦均支給當即分撥第
一隊五千餘名令海蘭察額森特普爾普保寧帶
領於初六日進發第二隊五千餘名

臣

色布騰巴

爾珠爾率同福康安烏什哈達特成額成德帶領

於初七日進發第三隊兵五千餘名臣阿桂率同
積福福珠里倭昇額海祿帶領於初八日進發其
自布朗郭宗喀爾薩爾應駐防兵現在常青派員
帶領兵丁隨同大兵之後遵照臣等指定地方兵
數逐處撥兵安設又自喀爾薩爾以至谷噶丫口
延綿百餘里其中如梭洛柏古等處臣另於經過
時隨地撥兵分駐並於總兵富紳六十六二人內
派出一人統領防駐其那木札伊達禮常保住帶

赴凱立葉助剿之兵二千名亦於初六日起行於

初十日必至薩爾赤鄂羅山會同豐昇額合攻

臣

等察看此番進剿不獨大臣鎮將踴躍圖功即偏

裨弁兵無不振奮思效賊酋遊魂自必立時掃滅

同日明亮富德奏言十二月二十八日各兵分隊

前進

臣

等即於初一日押後起程初五日巳刻抵

格藏橋計見敵之期尚早一日大營移動易見易

聞察看格藏橋以北木巴拉地方可以藏兵一面

酌量兵數密施號令查此次屯土兵共三千八百
餘名照所擬道路先行分派其滿漢各兵河北駱
駝溝一路派兵六千名由臣富德統領進攻河南
博堵一路派兵四千名由奎林三寶統領進攻俱
係緊隨土兵策應內將各項滿兵及黔滇兩省營
兵挑選出色奮勇者二千二百名督率土兵前進
以六百名截取卡卡角則由和隆武科瑪帶領以
五百名截取馬奈則由圖欽保拉布棟阿帶領其

對河木底格魯克古兩處各用二百名則由德赫
布噶塔布等預備皮船隨土兵前往夾攻尚餘滿
漢精兵七百名則隨奎林三寶攻取河南斯第博
堵而以珠爾格德劉輝祖為後援惟此路進攻先
議從墨壘溝翻山而下近於初二日大雪封山不
辨路徑因即撤赴格藏橋作三夜行走於初七日
夜潛渡河南深嘉卜繞出於時酌分二路先搶斯
第博堵為併奪思覺之計臣明亮統兵一千六百

名在河北馬奈進攻迎面賊卡賊人稍一奔潰則
乘勝直入何處須兵接濟何處併力向前臨時酌
量機宜務期全勝

同日阿桂奏言此次谷噶凱立葉兩路進攻恐賊
人稍有知覺是以如功噶爾拉登春前日駐兵之
處益復多張聲勢使賊人盡力於此萬不疑大兵
另有新路是谷噶一路斷不可遽為設站安臺使
賊得以預備但此地軍營滿漢各兵均係步行非

但不比西北兩路均給馬駝馱載並不如滇省出
師尚有騾馬而每兵一人計所帶火藥鉛丸各二
百出烏鎗一桿腰刀一把火繩十盤即已不下三
十斤又各關十日口糧計重數斤合計幾及四十
斤官兵負此四十斤之重越險攀高即不攜帶鍋
帳已屬費力若一月口糧以八合三勺計算幾及
二斗五升兩月口糧即幾五斗站夫每日緩行一
站而所背之米止有此數兵丁進征迅速斷不能

於軍火器械之外更裹帶如許之多臣等悉心籌酌以麪一斤抵一日口糧做成餅餌於官兵口食既屬相同而攜帶尤為輕便且可無庸舉火又以在前勁銳之兵疾趨掩襲愈速愈佳並於一隊之中又分三隊通融攜帶使在前之兵乘勝直入接踵之兵亦可邇來庶於兵食既無不繼之憂而前進銳兵益為輕利至此次進攻事事皆須妥辦亦事事皆關機密前此將進攻道路日期酌量籌定

未嘗不可將辦理夫糧之法通知富勒渾但此非
一人所能獨辦必行總理司道而司道等又必轉
飭各糧員勢將胥役夫頭盡皆知悉實不免於泄
漏機宜是以臣先時並未通知第熟計此路應設
若干站每站應需若干夫只令富勒渾等上緊籌
備均可敷用俟官兵將次見敵之時始令總理大
員帶領人夫遄行安設查布朗郭宗前抵谷噶計
程約共八九糧站自初九日起每日計安兩站至

十三日即可安設齊全而兵丁所支自初六日起
裹帶口糧是時將屆用亦適足以接濟

阿桂又奏言據王進泰成果報稱有博羅克守卡
將弁將自金川投出之小金川番人斯塔克達爾
得寶爾根闊勒等三名解赴大營

臣等訊明俱係

小金川覺寨人金川頭人帶伊等在南路放卡因
大兵到來押往金川家眷並未同去今潛行逃出
等語查覺寨地方本係賊目七圖安都爾所管是

以將該寨降番眷屬均發瓦寺土司收管今斯塔克達爾等所供父母親屬查對降番底冊俱屬相符當將斯塔克達爾等交與隨營瓦寺頭人派人押往令與家屬見面後仍即來營差遣均奏入

上諭軍機大臣曰阿桂等奏在布朗郭宗派兵分隊進剿情形又據明亮等奏在格藏橋分路撥兵進攻事宜所辦俱極妥協而阿桂另摺所奏各件均屬實心籌畫又阿桂奏據王進泰等報稱博羅克守卡將弁

將投出番人斯搭克達爾等解送大營是賊番於小路潛出並非難事恐其借名投降暗藏奸計自當早為防守若於隘口見有形跡可疑者即當立時剿殺既可多殲賊衆且使賊人知所畏懼不敢妄圖輒出王進泰常青等均當一體妥辦

同日阿桂奏言查金川賊人以内地土司悖恩反噬此其罪大惡極不可不滅惟臣知之最真故必期殄滅之心亦惟臣守之獨力惟是此地用兵兵

多而路多則收功倍速是以臣前此請添兵力為將來乘其不意出奇直搗之計今蒙

聖訓以再添一二萬亦非難事只期大功必成多費亦所不惜仰見

洞燭機宜片言居要今臣就現在兵力酌量添撥進剿仰荷

皇上威福自可易於深入但此後再有分用之兵乘四面環攻賊人支禦不暇之時搗虛直入則更可以

制其死命較之兵少而多需時日為費轉有節省
奏入

上諭軍機大臣曰阿桂奏就現在兵力派撥進剿自可
易於窺入此後倘得分用之兵搗虛直入更可以制
其死命等語前因美諾一帶後路兵少曾諭調荊州
駐防兵一千湖廣綠營兵一千赴美諾等處備用節
據阿桂等奏各處留防約計五千餘名是後路之兵
已足敷用無藉復待集兵此項二千兵俱係生力軍

若用以攻勦必當得用昨據陳輝祖等奏前項二千
兵已於臘月二十九正月初二等日全行出境計其
到川甚速若將此項兵丁歸於阿桂軍營留為另覓
新路分道進勦之用自屬得濟著傳諭文綬於此項
兵丁到省時即令遄赴布朗郭宗聽用並令阿桂籌
畫辦理一面奏聞

平定兩金川方畧卷八十六